

Projekti i Fiskalizimit

Duke filluar nga data 27.11.2018 ka filluar implementimi i Projektit “Përmirësimi i Modullit të Menaxhimit të Kontrollit të Faturimit”, njohur ndryshe si Projekti i Fiskalizimit. Ky projekt shënon një reformë të thellë në raportimin fiskal dhe administrimin tatimor të të dhënave.

Procesi i Fiskalizimit mundëson që procedurat e inspektimit tatimor të jenë transparente dhe efikase, duke e bërë kontrollin tatimor më efikas; rritje të ndërgjegjësimit për rëndësinë e kësaj çështjeje dhe zhvillimin e tregut të shërbimeve të IT-së, duke krijuar kushtet për konkurrencë të barabartë në treg.

Fiskalizimi është i bazuar në software dhe procesi mund të implementohet lehtësisht në të gjitha paisjet ekzistuese fiskale (pa pasur nevojë për një pajisje software sekondare vetëm për të operuar brenda sistemit të fiskalizimit). Në terma afatgjatë kjo ul ndjeshëm kostot e teknologjisë për tatimpaguesit.

Me këtë sistem do të kemi pasqyrë dhe monitorim në kohë reale të transaksioneve financiare, analizë të detajuar dhe parashikuese; analizë të riskut sipas modelit matricor duke përdorur të gjitha të dhënat e disponueshme nga AT në mënyrë proaktive. Referuar Ligjit Nr.87/2019 "Për faturën dhe sistemin e monitorimit të qarkullimit“, zbatimi i tij sipas fashave dhe llojit të transaksioneve, do të bëhet si më poshtë:

- Për transaksionet pa para në dorë ndërmjet tatimpaguesve dhe organeve publike (B2G), efektet e këtij ligji fillojnë më 1 janar 2021.
- Për transaksionet pa para në dorë ndërmjet tatimpaguesve (B2B), efektet e këtij ligji fillojnë më 1 korrik 2021.
- Për transaksionet me para në dorë nga tatimpaguesit (B2C), pavarësisht përgjegjësisë tatimore apo qarkullimit vjetor të realizuar, efektet e këtij ligji fillojnë më 1 shtator 2021

Çdo modul i implementuar është bazuar mbi dokumentet e kërkesave funksionale dhe teknike të përgatitura nga pala zhvilluese e projektit, të cilat i janë vënë në dispozicion drejtorive përkatëse për çdo rast të lidhjes së drejtpërdrejtë të modulit me funksionet e secilës, me qëllim njohjen dhe paraqitjen e çdo vërejtje, sugjerim apo kërkesë shtese dhe pas çdo implementimi nga ana e tyre janë realizuar seanca prezantimi dhe workshop-e me përfaqësues nga drejtoritë respektive.

Për sa më sipër, modulet/aktivitetet e finalizuara gjatë viti 2020 janë:

- Kuadri legjislativ (Ligji Nr. 87/2019 "Për faturën dhe sistemin e monitorimit të qarkullimit“ dhe aktet nënligjore në funksion të tij).
- Organizimi dhe metodologjia e monitorimit tatimor të tatimpaguesve në sistemin e transaksioneve me para në dorë.
- Zhvillimi dhe zbatimi i sistemeve për transaksionet me para në dorë.⁷⁶
- Portali Qendror për Kontrollimin dhe Menaxhimin (PQKM) e Tatimpaguesve për transaksionet me para në dorë.
- Sistemi i Menaxhimit të Riskut (SMR) për sistemin e transaksioneve me para në dorë.

- Monitorimi nga zyra nëpërmjet raporteve dhe të dhënave nga moduli Business Intelligence i tatimpaguesve në sistemin e transaksioneve me para në dorë.
- Aksesimi dhe monitorimi nëpërmjet tabletit për procesverbalin dhe kontrollin e të dhënave nga website në kohë reale.
- Zhvillimi dhe zbatimi i sistemit për transaksionet pa para në dorë (Fatura elektronike)

Bazuar në kuadrin ligjor të miratuar për certifikimin e kompanive prodhuese dhe mirëmbajtëse të zgjidhjeve software-ike, është në vijim procesi i certifikimit të këtyre kompanive nga ana e DPT-së në bashkëpunim me AKSHI-n, si për transaksionet me para në dorë, ashtu edhe transaksionet pa para në dorë (faturën elektronike). Kjo ndikon në hapjen e tregut dhe shkuarjen drejt konkurrencës së lirë, marrë në konsideratë që në tregun paraprak të tregtimit të pajisjeve fiskale ka pasur vetëm 4 kompani të autorizuara për tregtimin e tyre.